

Museum Ladin Ciastel de Tor: Richard Agreiter, n
artist ladin che ruva inò a cësa

La majera pert dla popolazionn ladina ne cunescherà
nia l'artist Richard Agreiter, nce sce l'à n cuinuem
ladin tipich dla Val Badia. Richard Agreiter ie
nasciù tla Boemia ai 25.03.1941 y bele d'autonn se
ova si genitoresc spustà da ilò a Steinberg am
Rofan. Sibes l pere che la l'oma fova dla Val Badia,
una de chèla families ladines che ntlëuta, ntan l
tëmp dl opzion, tl 1939, se n fova jic da si ncësa
per giaté n nuef albierch tl Austria. L pere fova de
Antermëia y si oma da Colfosch. Che l ebe sanch
ladin, chèl uel l'artist nstëss sottrissé, y mo
dassënn. Nia mé che l se sënt ladin, ma ël "ie" n
ladin, nsci dijel, nce sce l ne n'à mei mparà la
rujeneda dl'oma. Si oma rujenova cun ël tudësch,
dantaldut ajache si pere fova mort bëndebò prësc do
che i se ova trasferì a Steinberg am Rofan tl Tirol
y nsci ovela metù man de rujené tudësch cun ël.

Do avëi fat la scola d'ert a Dispruch ti ani danter
l 1955 y l 1961 fejel dal 1962 nchin al 1963 l
servij dl militer. Bele dan l militer se ovel crì ora
la streda artistica. Chësta fova si ispirazion y
nsci iel stat n iede sota n scultëur tla Svizra a
Wil dlongia S. Gallen pra l moster Gruber che
laurova tl lën y pona tl 1969 do che l ti fova unì
cunzedù n stipendium dal Land Tirol se ovel scrì ite
tl Academia d'Ert de Bruxelles ulache l à stlut ju l
stude cun la mieura votazion.

L'artist viv y lëura a Steinberg am Rofan tl Tirol.

Richard Agreiter ie n artist che lëura tl bront.
Si scultures nasc da si man pian via dal dessëni
passan tres la modelazion y ruvan nchin al dleghé dl
lëur tl bront. Agreiter defati ie un di puec artisc
che à nstëss na dlëigadoia. "L'artist muessa nce sué"
dijel y l dleghé y jeté ju l bront tla forma ie n
lëur de gran fadia, ma l ti pieta nce l mesum te uni
mumënt de pudëi lauré, cumedé y mudé details pra la
scultures. Günther Moschig, storich d'ert, scrijan
sun Agreiter, dij che l fat de pudëi ti sté do pra

uni fasa tl prozess dla creazion fej a na moda che l artist sibes tres ora te n dialogh cun l material. Cun l cunescer duc i sucrèc y l mister dl material, nsci Moschig, nasc la formes dla sculptures de Agreiter.

I lèures dl artist pea perdrèt via dala formes geometriches plu scèmples : la forma ovala, l cuadrat o l triangul. La formes daviertes ie balanzedes a chèles stlutes, la formes plèines cun la uetes. Ma nce al cajo ti la lascel valèi. Canche per ejèmpl cërta sculptures do che les ie unides liedies dala forma fata per la mplenì de bront se presènta cun resc de bront che normalmènter vèn limei demez, Agreiter i lascia. Nsci iel suzedù pra sculptures che reverda dantaldut i pèsc coche pra " Der grosse Hai" . I resc de bront te chèsc cajo devènta coche sgrofies o tl cajo dla scultura "Piscis" devènti coche dènz dl pèsc rapresentà.

Formalmènter se muf l'artist danter l figuratif y l'astrazion. Rapresenteda vèn dantaldudut la figura umana, ma nce l tier y la planta coche manifestazion dl'energia de vita nsci dij la storica d'ert Sylvia Mader. Agreiter nasc artisticamènter te n tèmp ulache se fej inant la tendènzes avanguardistiches y vaghedes coche la pop art, la Op art, la body art, l ert cinetica o te n tèmp ulache l'artist de Viena, Schwarzkogler se da ju cun l'ert te na maniera plu stravaganta. Ma da chèstes ne se lascel nia nfluenzé. Coche Sylvia Mader dij ie nsci plutosc n artist coche Henry Moore stat da gran ejèmpl per Agreiter.

L'idea de mèter ora la sculptures de Agreiter tl Museum ie unida do che n ova tèut su cuntac cun l'artist. Defati uelen cun chèsta mostra fé unì inò de reviers n "ladin" che pervia de rejons storiches se n'ie jic da si ncèsa.

L'inaugurazion dla mostra unirà fata ti salamènc dl Museum Ladin Ciastel de Tor a San Martin n venerdì ai 16 de messé dala 6 da sèira. Pra la giaurida saral na gran rappresentanza ora dl mond politich y culturel dl'Austria y de Südtirol. Presènc sarà nsci La ministra per afares da oradecà dl Austria la dut.a Benita Ferrero Waldner che giaurirà la mostra, l president dl Guviern provinziel l dut. Luis

Durnwalder, l'Assessëur ala Cultura Ladina l dut. Florian Mussner, l'Assessëura cumpetënta per i museums la dut.a Sabina Kasslatter Mur y l president di museums provinziai l dut. Bruno Hosp. N ucajion dla giaurida tenirà l Mag. Günther Moschig n curt n referat sun l'artist. Richard Agreiter nstëss dijerà vel parola.

L Museum Ladin Ciastel de Tor nvieia duta la popolazion a to pert ala giaurida dla mostra, che sarà coche dit n venerdì ai 16 de messé dala 18.00.

Stefan Planker
Diretëur dl Museum Ladin